

四庫全書

集部

欽定四庫全書

集部

元詩體要卷九至十一

詳校官中書臣瞿 熙

助教臣常循覆勘

總校官庶吉士臣何思鈞

校對官學正臣常 循

謄錄監生臣舒秀岐

欽定四庫全書

元詩體要卷九

明 宋公傳 編

無題體

無題之詩起於唐李商隱多言閨情及宮事故隱諱
不名而曰無題其間用隱語如身無綵鳳雙飛翼心
有靈犀一點通春蠶到死絲方盡蠟炬成灰淚始乾
之類可見此編效顰於李觀其辭運意之精亦庶幾
前人之可及矣

無題 馬祖常

瓦溝銀竹曙翻江
閨苑涼風滿石幢
葛令寄來丹白一
陶翁歸去酒瓢雙
梧桐寂寞陳宮井
薜荔扶疎玉女窓
天畔帝車呼小鳳
桂花流水夜淙淙

又

鶴城十二疊瑤光
琪樹懸秋四面香
蛺蝶染花生粉白
玻璃着酒暖金黃
薰鑪舊夢憑荀令
燭釵閒吟屬沈郎
南國鴈來書不至
江樓時為製荷裳

又

三湘瀟洒恨無潮
烏鵲填河願有橋
丹穴鳳來龍樹遠
海門魚上蜃樓遙
已知京兆誇高髻
不信章華鬪細腰
船尾橫江春水急
長年無事醉吹簫

又

愛酒書生白髮垂
鸞膠獺髓豈能醫
漢宮闌草端陽節
唐殿穿針七夕時
竹上蠅房真可買
石間芝箭似難移
揚雄擬奏河東賦
但乞君王酒一卮

和伯庸無題

薛宗海

羽林垂彩動天江幕府先懸白玉幢
吏法有章皆畫一將壇得士故無雙
臺中長夏霜凝簡掖內通宵霧鎖窓
若使九門容徑入肯思巖隱抱流淙

又

良人執戟侍明光誰與金鑪共夕香
粧鏡曉寒凝蝶粉舞衣春暖妬鶯黃
渡江桃葉應憐我照水荷花似見郎
歎息蹇脩無復理愁思慘手為縫裳

又

乘槎準擬逐秋潮却訪成都萬里橋
滄海有山皆縹緲青雲無路不迢遙
閒居潘岳驚班鬢歸去陶潛懶折腰
後夜相期明月上露臺高處弄笙簫

又

驥服鹽車兩耳垂臂無九折未成醫
欲尋箕顙終逃世苦恨章逢不入時
金井鹿鳴知露冷銀橋鵲度看星移
長貧久客應無補擬挽滄浪塞漏卮

次韻無題

袁楠

金縷歌殘月墮江
玉顏曾憶侍油幢
象床雲重恩專一
鯨錦波翻賜疊雙
春淺正宜羶作幕
夜涼深恨魴為窓
浣沙可是無靈匹
側足寒江賤石淙

又

翠簾匝匝護朱光
千葉宮桃滿院香
閨苑有鸞通尺素
虛橋無鵲寄流黃
上林賦罷歸巴蜀
興慶詞工謫夜郎
不是月中親度曲
世人那解聽霓裳

又

相期來似石城潮日望晴虹結綵橋却月眉愁歌漸遠
凌波步近意非遙抽琴有恨回清角疊袖無塵轉綠腰
弄玉最憐隨鳳去秋來誰與伴吹簫

又

白髮詞臣兩耳垂華腴堆缺陋牛醫宮娥引燭催麻日
院吏傳宣寫制時蠟撚化生秋夕賜翠標疊勝歲華移
低頭欲說唐朝舊願侍虛皇進玉卮

自次無題

馬祖常

崑崙山下錦成江好買玄都翡翠幢竹種篋簞千萬箇
鳥飛鷗鷺兩三雙銅龍漏下春生水金馬神來霧歛窓
花落天台招小隱胡麻飯熟石淙淙

又

切玉龍刀寶氣光祿羅半臂麝臍香荔支囊蜜媽媽紫
盧橘團金顆顆黃秦氏故侯更漢主石家小婦嫁孫郎
江心誰鑄芙蓉鏡照見姮娥織翠裳

又

錢塘八月水生潮
筇笮千年竹作橋
簾纖龍鬚天路近
衣裁蟬翼渚宮遙
府中丞相魚垂帶
閭外將軍箭插腰
無柰黃金閒買賦
雲間學得鳳皇簫

又

樂部韋娘舞小垂
病來能召翰林醫
嗔人書奏三千牘
勸客歌詩十二時
金谷花枝隨雨盡
石城江水逐潮移
世間若有神仙術
西去瑤池醉酒卮

無題 張翥

見時略略望遙遙有月闌干待袖招得巧蜘蛛絲縷細
傳聲鸚鵡舌關嬌仙家絃管寧無譜天上星河亦有橋
雲雨或時消息斷不如朝暮石城潮

無題 虞集

貝闕珠宮夜不眠露華皓皓月娟娟不應又作人間夢
窈窕吹簫度碧烟

詠物體

詠物起於唐末如雍陶池鷺鄭谷鷓鴣所詠雖入外
意而不失模寫之巧有足喜者周伯弼謂隨寓感興
者易驗物切近者難此說是矣詠物最多今亦擇其
入格者載之

筋香

薛漢

奇芬擣精微纖莖挺脩白地輕雪消曉火紅螢耀夕素
烟裊雙縷暗馥生平室鼻觀靜裏參心原坐來息有客
臭味同相看終永日

雙陸揭奚斯

三五對參差高呼得采時猶疑雙出早每恨獨歸遲散
地偏難入全功或誤竒極知妨日力聊足審安危

廬阜鐘聲

廬山三百寺何處扣曾雲宿鳥月中起歸人湖上聞入
空應更迥近瀑正難分遙想諸僧定香爐上夕薰

漁笛林景熙

三弄知何處蒼茫起釣舟閒將千古意吹入一江秋驚

鴈顧殘侶寒風生別洲曲終和月臥無夢到涼州

釣絲風連百正

短髮冷颼颼倚闌初下釣閒來片水外輕弄一痕秋淺
拂蘆花亂低分柳影浮烟波清夢遠吹不到公侯

柳絮風黃清老

三月韶光天氣清游絲舒卷太無情微飄簾幙當春晝
亂撲庭臺似雪晴醉臉欲吹新燕弱舞腰初軟落花輕
江頭點點行人淚相逐離歌洒客程

藕花風謝宗可

舞罷紅衣起未休
水雲香裏冷颼颼
五更清逼銀塘曉
六月涼生玉井秋
颭浪低翻霞影亂
凌波輕漾錦香浮
莫教吹醒鴛鴦夢
好送真人一葉舟

梧桐雨黃清老

曾將秋信報人知
又與西風泣別離
病綠滴殘猶有淚
題紅流去更無詩
舊巢鳳冷朝飛遠
古井金寒曉汲遲
待得楚臺雲散後
却憑琴調寄相思

春晝

梁彥中

溪水搖光動綠牆
雲山倒影蘸霞觴
一庭芳樹清陰薄
千尺游絲白日長
風細柳塘鶯語滑
泥融花徑燕飛忙
乾坤俯仰窺難盡
花柳無私種種香

曉色

謝宗可

遠似烟霏近又空
非明非夜兩朦朧
一天清露洗難盡
幾樹暗雲遮不窮
斷角樓臺濃澹裏
殘燈院落有無中
蒼茫半逐雞聲散
又被朝陽染作紅

潮仇仁遠

一痕初見海門生
頃刻長驅作怒聲
萬馬突圍天鼓碎
六鰲翻背雪山傾
遠朝魏闕心猶壯
直到嚴灘勢始平
寄語吳兒休踏浪
天吳固象正縱橫

愁同怨

來時容易去何遲
半在胸中半在眉
門掩落花春去後
窓涵殘月酒醒時
濃如野外連天草
亂似空中惹地絲
除却五侯歌管地
人間何處不相隨

人影劉宗遠

不言不語過平生步步相隨似有情
常向燈前同靜坐每於月下共閒行
昨朝離去天將暝今日歸來日又晴
最是行藏堪愛處顯身須要待時明

淚施鈞

懶隨空勞補舊痕離筵歌罷忽沾巾
半江湘竹斑斑雨三月楊花點點春
字濕錦機啼成婦珠明綃室泣鮫人
琵琶滴罷情深處洗盡青衫幾掬塵

梅 仇仁遠

爲怕緇塵着素衣凍痕封蕊放香遲月來忽送闌干影
春到不分南北枝啼夢翠禽依樹宿斷魂玉笛隔花吹
從他萬片隨風去須有青青葉底時

又

夢想幽芳無處尋相逢依舊歲寒心要看月底玲瓏玉
休折枝頭苦蕾金清曉風霜和艷冷黃昏庭院覺香深
揚州一樹春多少帶得何郎瘦不禁

紅梅 楊載

玉人中酒殢芳華盡壓東風百種花
襖被春寒裁異錦
篝燈夜永障輕紗
纖韃露沁蜂腰蠟
密蕊雲蒸鶴頂砂
為問閨風何處在
相期高舉簫晨霞

又 金德啟

醉卧西湖處士家
夢回唯見赤城霞
惔然冷艷隨春變
依舊疎枝映月斜
姑射冰姿凝絳蜺
羅浮雪骨換丹砂
北人慣在江南住
猶說前村有杏花

蟠梅謝宗可

縈春絆碧綴蒼苔歲晚寒香宛轉來蛟蟄凍雲冰骨瘦

原闕

雪穗翻成漩水渦
蕩漾終難浮釣艇
潑來不覺濕漁蓑
牧童錯認忙歸報
盡道崆峒作海波

蒲劍黃君瑞

三矢亭亭古太阿舞風斫斷一川波長橋有影蛟龍悞
流水無聲日夜磨兩岸帶烟生殺氣五更彈雨雜漁歌
蕭蕭只恐秋風至亂剗鋒芒恨更多

海南鳥劉因

越鳥羣飛朔漠濱氣機千古見真純紇干風景今如此
故國園林亦暮春精衛有情嗈太華杜鵑無血到天津
聲聲解墮金銅淚未信吳兒是木人

鶴夢 失名

九臯霜冷寂無聲一覺遊僊思更清
風過松窩酣未醒
烟生茶竈倦還驚
青田月下家千里
赤壁舟中夜幾更
香暖紫芝初睡足
莫教琴上玉絃鳴

睡燕 謝宗可

補巢銜得落花泥
困倚東風倦翅低
金屋晝閒隨蝶化
玉堂春靜怕鶯啼
鳬飛漢殿人應遠
夢入烏衣路欲迷
却被捲簾人喚醒
小橋流水夕陽西

鴈端景元

年去年來無定年
帛書曾寄漢英賢
影橫薊北月連塞
聲斷衡陽霜滿天
雨暗荻花愁晚渚
露香菰米樂秋天
平生千里與萬里
塵世網羅空自纏

鴈字謝宗可

蘆花月底寄秋情
陣影南飛寫不停
一帶畫開湘水碧
半行草破楚天青
雲牋冷印蟲書跡
烟墨濃模鳥篆形
題盡故鄉心事苦
斷文無數落寒汀

又名

故國霜前省舊遊
夕陽影裏見銀鈎
都將塞北千年恨
寫破江南萬里秋
一畫如真橫遠漢
數行帶草落平洲
傳書莫到秦淮上
明月蘆花客正愁

猫 唐珙

覓得猫奴太有情
烏蟬一點抱唇生
牡丹架暖眠春晝
薄荷香濃醉曉晴
分唾掌中頻洗面
引兒窻下自呼名
溪魚不惜朝朝買
贏得書齋夜太平

懶貓濟天岸

老子家無甌石儲多君分惠小狸奴職慙捕鼠饑何憾
食不求魚飽有餘燭影爐薰聽課佛蒲團竹几伴跏趺
山童莫訝長尸素也護床頭貝葉書

混堂謝宗可

香泉湧出半池溫難洗人間萬古塵混沌殼中天不曉
淋漓氣底夜長春波濤鼓怒喧風雨雲霧垂陰護鬼神
却笑相逢裸形國不知誰是浴沂人

蠟梅屋施鈞

蕊珠宮殿玉闌干四壁玲瓏夜不關梁棟廣平真鐵石
根基和靖舊溪山乾坤虛白生方寸雲月昏黃共一間
可笑三間元不識蕙櫨蓀壁水潺潺

破屋 失名

一番風雨一番顛卷我書齋屋頂穿紅日透光來枕上
白雲拖影到床前小鐙煮茗烹明月古硯濡毫蘸碧天
寒士夜來讀周易燈光直射斗牛邊

瓦

四角稜層夜不收
覆成行隴仰成溝
能令有漏為無漏
解使斜流作正流
蟠螭一條橫脊上
鴛鴦幾對宿簷頭
莫言陶冶工夫小
曾為吾王蓋九州

詩瓢 謝宗可

雨蔓霜條老翠壺
吟邊不是酒葫蘆
剖開架上輪囷玉
著盡甕中錯落珠
滿貯苦心留宇宙
深藏情氣付江湖
誰家半腹能千首
為問山人果在無

秃筆 王秋江

被榜深屋未出林摧殘豈信有如今拔毛本欲利天下
秃鬢方知負此心老死不歸刀吏手平生常得侍臣簪
斯文功在終難泯月裏東君有好吟

筆陣 謝宗可

授策登壇拜墨卿霜毫不用鐵為兵戰酣已拔三都壘
奏捷還攻五字城怒卷龍蛇雲霧泣長驅風雨鬼神驚
攀蟾獨掃千軍退功奪中書第一名

金分月
卷九
塔燈馮海粟

擎天一柱碍雲低
破暗功同日月齊
半夜火龍蟠地軸
八方星象下天梯
光搖灩澦沿珠蚌
影落滄溟照水犀
文燄逼人高萬丈
倒提鐵筆向空題

鏡中燈

張周卿

孤影徘徊入照臨
西風不動竟沉沉
一池鉛汞鎔真火
半夜金星犯太陰
雞翅拍時紅焰息
蛾頭觸處碧光深
從渠百煉千燒後
依舊剛明一片心

馬騎燈 袁楠

功計凌烟作戰場
宵征勇將太匆忙
不聞號令齊驅疾
自覺銜枚去路長
焰裏春風鑒赤壁
光浮夜月燬阿房
誰能跳出機關外
不為功名紙半張

走馬燈 謝宗可

颼輪擁騎駕炎精
飛繞人間不夜城
風鬣追星低弄影
霜蹄逐電去無聲
秦軍夜潰咸陽火
吳炬宵馳赤壁兵
更憶雕鞍年少客
章臺踏碎月華明

梅花燈籠 失名

翠節玲瓏玉骨涼
分明照見鐵心腸
一挑銀焰勾春色
萬點金錢散夜光
帶月橫霜疎弄影
篩金滿地暗生香
幾回引馬歸來後
青鳥無聲更漏長

菊枕 馬祖常

東籬采采數枝霜
包裹西風入夢涼
半夜歸心三逕遠
一囊秋色四屏香
床頭未覺黃金盡
鏡裏難教白髮長
幾度醉來消不得
卧收清氣入詩腸

梅杖 謝宗可

紫玉槎牙蝕蘚痕
黃昏扶醉倍精神
一枝冷曳孤山雪
八尺橫拖庾嶺春
江路策時香在手
溪橋桃月影隨人
歸來却笑林和靖
還現堂中上座身

琉璃簾

馬祖常

吳儂巧製玉玲瓏
翡翠蝦鬚迥不同
萬縷橫陳銀色界
一塵不入水晶宮
月華遠射離離白
燈影斜穿細細紅
相隔神仙纔咫尺
靈犀一點若為通

酒旗謝宗可

水村山郭酒初香
紵影青青字一行
鑪畔低懸花霧濕
簷陰斜揭柳風涼
指揮意馬衝愁陣
搖曳心旌入醉鄉
惆悵步兵招不起
半竿空自舞斜陽

釣絲

臨流纖影衆鱗驚
消得長縲一縷輕
鈎墜亂縈春水碧
竿垂斜裊曉風清
牽回江上烟波夢
掣斷人間富貴情
我欲笑携十尺去
桃花浪裏拔鯢鯨

鞦韆楊鵬翼

日轉華簷樹影偏
謝家庭院簇神仙
綵繩斜擘纖纖玉
畫板輕承步步蓮
弄玉未升霄漢上
綠珠先墮綵樓前
不知小徑殘紅裏
明日何人拾翠鈿

又 台哈布哈

芙蓉宮額半塗黃
雙送鞦韆出畫牆
簷底燕驚花雨亂
樹頭蜂繞襪塵香
巧將新月添眉黛
閒倩東風響珮璫
歸去綠窓和困睡
暫憑春夢到遼陽

蓮葉舟 謝宗可

穩棹紅衣泛渺茫
風帆浪楫水雲鄉
曉撐泰華半峯月
夜載西湖十里香
藕放雪絲應作纜
荷歌翠柄若為檣
不須更捧金仙足
太乙真人夢正涼

櫓 失名

斲木為竿駕客舟
翩然快我下中流
雙龍影落湘江晚
百鴈聲傳楚岫秋
素練撥開波浩渺
黃金攪碎月沉浮
長灘鷗鷺多如雪
一路驚飛不敢留

仙槎謝宗可

曾作河源萬里舟，塵根已斷卧蛟虬。
無心下土承烟雨，有路層霄犯斗牛。
破浪遠衝銀漢曉，凌風竟度碧天秋。
歸來載得支機石，誰識人間博望侯。

老龍琴羅伯英

夔下曾聞霹靂聲，流傳太古蓄精靈。
斷紋已作蜿蜒勢，焦尾猶存蚺蜥形。
案上清宵含霧雨，壁間白晝隱雷霆。
鳳簫縹緲音相和，相送羣仙入杳冥。

無絃琴謝宗可

獨繭長縑底用抽蛇紋空鎖鳳枝秋落星有暈繩光斷
凍瀑無聲練影收別鶴那聞風外泣孤鸞不向月中愁
多情只有柴桑老寂寂山高水自流

鶴骨笛賈策

九臯聲斷楚天秋玉頂丹砂一夕休枯朽挽回生死調
淒涼吹盡古今愁魂歸遼海雲迷樹曲罷江城月滿樓
惆悵主人三弄罷杳無消息到揚州

鐵笛詩寄楊廉夫 卞宜之

一段清冰百鍊鋼
曾翻宮徵侍虛皇
裂開黃鶴磯頭石
驚落青鸞鏡裏霜
仙子珮環新樂府
翰林風月舊文章
道人清節磨礪久
却笑桓伊獨據床

鐵笛為孟天暉作 張翥

愛此輕圓鐵鑄成
何須楚竹選孤生
年多化作青蛇色
夜靜吹如綵鳳聲
鏽出碧花凝錯落
冷涵金氣發鏗清
最宜携向君山去
一聽仙翁奏月明

聞遂

何人吹笛傍江干，木落淮南夜色寒。
三弄水邊人艤棹，一聲雲杪客凭欄。
梅花簌簌吹應落，楊柳依依折欲殘。
惆悵綠珠何處在，綺窓深鎖月漫漫。

聞簫 王景初

緱山雲冷鳳臺空，誰譜遺音泣玉龍。
興在碧桃春色底，聲飄銀漢月明中。
悲來赤壁歌誰和，老去青樓夢亦慵。
喚起愁心眠不得，露筇寒倚一簾風。

破帽 黃君瑞

破帽多情却戀頭
草殘絲斷素塵浮
烟籠長是煎茶日
風落多逾把菊秋
頂漏疎星窺短髮
簷垂缺月露雙眸
桃尖樓子青羅辦
相對寧知故舊愁

蘆花被 貫雲石

採得蘆花不浣塵
翠衰聊復藉為裯
西風刮夢秋無際
夜月生香雪滿身
毛骨已隨天地老
聲名不讓古今貧
青綾莫為鴛鴦妬
欸乃聲中別有春

紙帳謝宗可

清懸四壁剡溪霜高卧梅花月半床
蠹窠有天春不老瑤臺無夜雪生香
覺來虛白神光發睡去清閒好夢長
一枕捻無塵土氣何妨留我白雲鄉

酒黃君瑞

麴蘖生香出小槽幾人耽酌日陶陶
咲吞鸚鵡杯中月貧典鷓鴣花缺袍
內府騰傳紅琥珀西京秋壓紫葡萄
杜康儀狄今安在回首丘陵半是糟

碧筩酒 趙君謨

擎波老幹折蒼瑤
酣飲何如吸海鯨
象鼻捲冰收玉醴
翠盤承露落金莖
幾絲香溜蒲萄滑
九竅春濃琥珀傾
莫戀醉鄉心更苦
獨醒衣上為誰清

又 袁桷

甘露無聲墮玉盤
中天飛影動琅玕
壚頭太白塵埃熱
石眼空青冰雪寒
水泄尾閭來瀚海
手扶砥柱障狂瀾
麴生不用忙傾蓋
吸盡清香見肺肝

又張雨

採綠誰將作羽觴使君亭上晚尊涼玉莖沁露心猶苦
翠蓋擎雲手亦香飲海龜藏蓮葉小吸川鯨恨藕絲長
西風誤展淋郎袂笑絕耶溪窈窕娘

醉鄉謝宗可

曾笑三閭不解遊移家欲向麴城頭人酣方外鴻荒夢
誰識塵中富貴愁夜月放船遊酒海春風扶杖上糟丘
相逢還似無何有喚起東臯為贈侯

又張翥

半屬華胥半酒泉封君惟有麴生權觥籌席上無多地
風月壺中別有天一日夢醒如隔世四時春盡不知年
從來此處藏身好容我神遊太古前

塵謝宗可

人海深藏混混中非烟非霧遠空濛六街綺繡迷香紫
九陌笙簫踏軟紅微步緩隨羅襪起清歌飛繞畫梁空
南來一騎蛾眉笑又送長安荔入宮

遊絲

搖曳春光百尺輕烟綃舞斷任縱橫暗縈芳恨應無力
亂綰花愁似有情一縷綠楊風正軟半痕紅杏雨初晴
莫教飛到天機上恐悞龍梭織不成

綠陰

周石原

萬紫千紅夢已休眼中驚見翠光浮數聲啼鳥無尋處
幾度斜陽不入樓潤透琴書渾欲雨涼生衣袂已先秋
此時蒲柳還多感莫道西風一夜愁

又顧困白

千載青羊領底髯結成蒼

缺

倚空檐朝陽不放晴光墮

宿雨時將暝色添蟬愛

缺

聲度枕鳥窺荒寂影翻簾

且須藹護過長夏未怕秋霜遽作嚴

新月周豈

稍向天邊落初從雲底生徒然似鉤曲能得幾時明

桃花馬

馬祖常

白毛紅點巧安排勾引春風上背來莫解雕鞍橋下洗

恐隨流水泛天台

鄰燈范梈

星星遠映孤村外
炯炯微穿落木間
知有鄰姬思遠道
績麻應待夜深還

塵貢師泰

春城花霧欲生泥
十二街頭漫漫飛
落絮遊絲共無賴
半沾香汗半羅衣

無弦琴申屠致遠

靜中有物即縈心物象相忘趣轉深為報柴桑陶處士
無絃爭似更無琴

水仙花 商挺

海上三山壁月明人間誰識許飛璫秋風吹上青鸞背
來散天香與素英

又

明月珠衣翡翠裳冰肌玉骨自清涼不隨王母瑤池去
來侍維摩病几傍

又貢師泰

太液池邊雪始乾
曉粧初試珮珊珊
簾鉤欲下東風細
猶夢珠宮扇影寒

又

十二瑤臺風露寒
銀河淡淡月團團
龍宮自與塵凡隔
別有銖衣白玉冠

木芙蓉

虞集

九月襄王宴渚宮
霓旌翠羽度雲中
滿汀山雨衣裳濕

宋玉愁多賦未工

水芙蓉

長洲宮沼醉西施
蕩漾蘭舟不自持
願奉君王千歲樂
一盤清露玉淋漓

元詩體要卷九

欽定四庫全書

元詩體要卷十

明 宋公傳 編

五言律

律詩號近體唐人始為之清遠華麗必諧音韻周伯
弼謂有雍容渾厚之態而無堆積窒塞之患斯為妙
也後人為之不偏於枯瘠則流於輕俗不足採者多
矣今擇其格律嚴整者錄之

春思 張澄

一春長作客連日苦多風野樹淒迷綠簷花黯淡紅愁
隨詩卷積囊與酒樽空巢燕如相識頻來草舍中

春晝睡起

陳自堂

柳影年華度鶯聲午夢回偶然床置易政爾席凝埃隱
几野花落閉門山雨來無人見愁緒歡伯一樽開

早春述懷

劉汶

春與年年別窮隨日日增眼明貪夜讀事少忘晨興倦
鳥猶遷木潛魚已陟水棲遲唯故轍無夢到飛騰

秋晚趙心遠

一曲菱歌斷西風吹鬢髮秋隨荷葉老人到菊花閒鳥
弄疎烟外楓明落照間南山有清氣相對自怡顏

七夕傅若金

耿耿玉京夜迢迢銀漢流影斜烏鵲樹光隱鳳凰樓雲
錦虛張月星房冷閉秋遙憐天帝子辛苦會牽牛

除夜與鄔進德蔡明

客裏冬將盡惟君數見親可憐今夜雨同作異方人腸

酒無鄉味征衫有客塵
毋勞話岑寂明日又逢春

登武陽劉因

朝遊樊子館晚上武陽城
潮接滄溟近山從碣石生
斷虹雲淡白返照雨疎明
日暮悲風急樵歌已愴情

過奉先

閭遼承宋統此志亦雄哉
置縣名猶在因山勢已摧
百年元魏史千古汝南哀
華表鶴應有悲風海上來

雜詩

聞昔蜚狐口奇兵入搗虛人才九州外天道百年餘草
木皆成騎衣冠盡化魚遺民心膽破諱說戰爭初

雪巖樓觀

虞集

高閣丹青起中天紫翠分窻當太白雪門俯九疑雲伐
木山人去吹簫帝子聞塵中歸未得春思轉紛紛

鄣南光武廟

陳孚

赤伏真天子玄圭袞藻明千年高邑廟一笑下江兵野
鬪騰龍氣河流渡馬聲列侯冠劍合英彩儼如生

寄暢純父治中姚燧

欲聞真息耗無使梓潼來烽火平時報田疇亂後開徒歌王粲賦不直士元才遙憶牛頭寺思親日幾迴

寄劉師魯楊載

想君遊宦處正值洞庭湖落日波濤北晴天島嶼孤舟航通漢沔風物覽衡巫天下文章弊非君孰起予

寄靜庵山人貢師泰

細雨桐花晚微風麥氣秋王符偏好學宋玉不勝愁世

事同蕉鹿人心類棘猴何時虎溪上還共遠師遊

名酒 虞集

名酒不可得幽花誰送來秋霜垂鬢髮夕照在樓臺盡
日山翁醉何年庾信迴喚人吹玉笛移席坐蒼苔

尋故人 黃清老

適興一尋君君家在白雲幽花秋後見落葉夜深聞隨
意坐苔石呼童煮澗芹不須談世事詩思正紛紛

昨遊 范梈

昨遊居士澗春入羽人丘面面山相引年年水自流
乾坤雙蠟屐江海一漁舟知我能來否啼鷺去復留

輿病高厓道中作

姚燧

役役乾坤遠栖栖道路頻五年三入蜀十夢九歸秦
瘴鬼偏凌客山英定笑人無勞問前渡祇覺白頭新

舟達黃溪

草木隨寒暑殊方勞悴同葦花兼露白檉葉未霜紅
日月雙飛鳥江湖一病翁晚來沙嶼上愁坐獨書空

過三花嶺

陳孚

絕壁三千丈荒村八九家黃茅青草缺黑質白章蛇橄
攬高懸子芭蕉倒吐花嶺頭一回首何處是京華

岳陽樓待渡

高思恭

楚水凝千里湘雲隔萬層城高秋浦月星雜夜船燈旅
況天誰管年光鴈可憑殷勤淡山色相送過巴陵

以事暫如武昌發臨川

揭傒斯

江轉欲無路山迴忽似圍客程秋共遠物色晚多疑稍

稍沙鷗集忽忽野樹稀武昌今夜夢定有故人知

泊舟湘岸 李材

長沙今在眼青草舊知名二月風檣疾三湘雪浪平
藤深帝子廟花發定王城暮艤江南岸鳴鵲處處聲

雨中過長沙湖 余闕

細雨洒秋色平湖生白波客心貪路急帆腹受風多
落木生秋思驚禽避棹歌舟行不借酒兀坐奈愁何

趙氏南莊 許衡

曉起北窓涼清談戢羽觴入簾花氣重落紙燕泥香夢裏青山好吟邊白晝長秋風載書籍相對築茅堂

病中齋居雜詩

安熙

多病交游少相看動浹辰賦詩聊遣興觀化足怡神問事有知己過門無俗人伊誰同此樂願卜許東鄰

感事

姚燧

致位承疑地夔龍伯仲間星當朝北斗日已薄西山取謗因讐惡貪權失丐閒此行雖鐵甲未足比慙顏

感懷陳亨

濫直承明署身閒似地仙雖無官長罵未敢酒家眠瘦
已寬朝服貧猶乞酒錢最愁親舍遠夢遶白雲邊

客寒趙孟頫

夜雨鳴高枕春寒入敝袍時光自花柳吾意豈蓬蒿失
色黃金盡知音白雪高山林隱未得空覺此心勞

俞氏看雨軒揭奚斯

慘淡來何處崩騰忽滿城遙連四山黑近灑半江明可

愛花間濕偏宜竹上聲中宵未可住高枕寄餘情

赤壁圖 虞集

過鶴生新夢携魚憶舊遊清霜凋木葉落月湧江流
隱者誰堪訪良田亦易求如何玉堂夜白髮不勝愁

錢舜舉畫

一樹花如雪清明客未歸坐看黃鳥並夢作綵雲飛
翠袖寒猶薄羊車過絕稀相如能作賦月下卷春衣

題黃觀瀾卷 貢師泰

碧天看不盡滄海去無邊氣涌風雷動光涵日月懸
奇文方浩瀚餘景尚漪漣好種珊瑚樹他年繫釣船

分題得獲麟堆送李伯貞庶使往山東

正朔周王紀春秋魯國書瑞齊圖鳳鳥靈趾應闕
絕筆懷西狩揚鑣過舊墟泰山青萬古相對一躊躇

賦得鉅野澤送宋顯夫僉事之山南余闕

堤上柳沉沉春蒲泛渚禽濟田東匯濶汶水北流深
落日依中沚浮雲積太陰微茫看不盡渾似別時心

京下思歸

范梈

黃落薊門秋飄飄在遠遊
不眠聞戍鼓多病憶歸舟
甘雨從昏過繁星達曙流
嚮非徐孺子萬口薄南州

送人遊廬山

張鳴善

曾到匡廬境峴峰際碧空
萬松無路入一水與天通
白鹿眠晴晝青猿嘯晚風
洪厓如可約吾亦訪雲中

送吳生良遊金陵

楊維禎

十載辭京國長懷玉笋班
鳳麟遊壁水虎豹啟天關
野

樹分秦雨江雲隔楚山壯遊須努力況予正紅顏

泊普照寺贈湛講主

渡海曾無約登山若有緣相逢林下路共飲石間泉棋
落燈花雨琴清柏子烟明朝厭塵跡從此學逃禪

別弟劉聞

一棹烟和水寒燈弟與兄殘年同別母中道復分程動
有山河隔難為去住情如何沙上鴈偏向夜中鳴

有懷袁季源

周密

江樓深夜倚涼入鬢蕭蕭人隔東西浙心隨早晚潮風
高孤月暈河澹萬星搖欲寄今宵意新鴻不可招

黃尊師高軒觀鵝因留宿 揭傒斯

開軒南嶽下世事未曾聞落葉常疑雨方池半是雲偶
尋騎鶴侶來此看鵝羣一夜潺湲裏秋光得細分

晚過孔奉常舍下 范梈

滄江一萬里書信近如何向暮客懷薄及秋鄉夢多故
人相慰藉並舍數經過但願長無事彤庭接珮珂

西坡即事

陳天錫

人境得佳趣青松處士家
成行看過雁數點落歸鴉
風動竹凋葉秋高菊吐花
閒來媚幽獨吾志在烟霞

臨平即事

四月臨平路江蓮未著花
清風隨客棹綠水護僧家
對酒邀新月披襟挹彩霞
晚來堪畫處飛鷺下圓沙

季夏書事

歸夢繞滄洲胡為此滯留
雨收三伏暑風送一帆秋
汀

樹層層出鹽花拍拍浮相思千里月人在海邊樓

江村苦雨劉宗遠

雨脚何時住江流逐日深一寒違衆務百慮集歸心夕
景含饑色春光墮積陰去年攜酒處月滿杏花林

淵明畫像顧濟

無錢猶愛菊有酒即橫琴萬古醉不了
一名閒到今徑松存老節門柳積秋陰人盡歸來像誰傳歸去心

七言律

七言律難於五言律自唐沈佺期宋之問倡而為之
研練精切穩順聲勢殆變陳隋委靡之陋學者宗之
號曰近體沈宋以下格律最多似難徧舉今擇其情
景俱備體量適均無柔弱鄙俗之病有諧婉麗則之
音首尾相應者列之

大明殿早朝

楊載

玉氣浮空御殿開金衣照日近臣來絲囊已進千秋錄
斧座還稱萬壽杯王子吹簫雙鳳下羲和攬轡六龍回

侍臣此日霑恩賜散作祥風遍九垓

元日朝回和裴都事

李林

海上瓊樓接五城人間歌吹近蓬瀛雲移雉尾旌旗動
日射螭頭劍佩明拜舞盡隨仙仗入退朝遙認玉珂鳴
欣欣百草含春意得傍東君暖處生

朝回次韻楊司業

吳澄

風吹仙鶴下瑤臺閭闔中間翠輦來雲擁紅光千丈上
日行黃道九天開百官星拱環金闕萬壽聲回進玉杯

共覩太平新氣象四方犴獄長春苔

六月十八日早朝寄山中諸友吳全節

五年四覩六龍飛又領羣仙覲紫微
金殿雲烟浮黼几玉階日月麗旌旗
羣臣奉壘勤三讓國母臨朝重萬幾
遙食蟠桃知幾次客星還照釣魚磯

大明殿早朝聽赦吳元德

玉檢泥封墨未乾紫衣捧出殿中間
九重雨露頒春澤上界星辰綴曉班
仗簇禁林環虎旅香消御座見龍顏

微臣何幸沾恩寵未報涓埃兩鬢斑

興聖宮退朝口號

蹀躞青驄白玉珂百官朝會日相過
天臨奎壁星辰近雲覆蓬萊雨露多
壽岳倚空開寶殿御溝流水遶金河
微臣稽首無封事願進清平第一歌

十一月六日大明殿賀清祀禮成

張翥

大明宮殿彩雲間花底微風響珮環
陸戟九重周虎士御筵咫尺望龍顏
犬牙磐石諸侯國豹尾鈎陳百辟班

漏下五門朝退晚日邊佳氣滿西山

宣則門書事簡虞邵庵

台哈布哈

三月龍池柳色深碧桃烟暖日悄悄蜂粘落絮紫青瑣
燕逐飛花避綠沉仙仗曉開班玉笋雲韶春奏錫瓊林
從臣盡獻河東賦獨有揚雄得賜金

丁卯科及第謝恩崇天門

薩都拉

禁柳青青白玉橋無端春色上宮袍卿雲五彩中天見
聖澤十年此日遭虎榜姓名書勅紙羽林冠蓋豎旌旄

朝回龍尾頻回首午漏花深紫殿高

十月十九日詣光天門進三朝實錄范梈

儀鸞簇仗滿雲端玉鑰初開衆樂攢
三后龍光周典冊羣臣鵠立漢衣冠
爐烟着日浮晴鵲宮樹班霜試曉寒
千騎前頭都不見只傳學士拜金鑾

庚午興聖殿進史黃清老

瓊裾初進侍明光日麗昆池晝刻長
堤柳染成春水色宮花併入御爐香
金壺洒露層堦滑玉碗分冰廣殿涼

金匱要略卷十
卷十
矇眴似知天意喜鳳笙新奏五雲章

勅賜恩榮宴 薩都拉

內侍傳宣下玉京四方多士預恩榮
宮花壓帽金牌重舞妓當筵翠袖輕
銀甕春分官寺酒玉盃香賜御厨羹
小臣涓滴皆恩澤惟有丹心答聖明

大明殿侍宴 陳益稷

班陪玉笋侍紅雲日表熙熙瑞氣溫
萬派朝宗滄海濶衆星環拱紫宸尊
雍容湛露歌詩什彷彿鈞天入夢魂

孤孽秋毫皆帝力願殫忠赤報深恩

初科知貢舉

李孟

百年場屋事初行一夕文章聚帝京
豹管敢窺天下士龍頭誰占日邊名
寬容極口論時事衣被終身荷聖情
願得真儒佐明主白頭應不負平生

奎章閣讀進士卷

虞集

玉堂策士詔儒臣御筆親題墨色新
省樹坐移簾底日宮壺融賜殿頭春
虞廷制作變龍盛漢代文章賈董醇

書閣暮年偏感遇但歌天保播皇仁

貢闈偶成黃清老

射宮圍棘斷經過閒却秋聲太液波風定碧簾聞禁漏
夜殘銀燭見星河仙人共對青藜杖詞客孤吟白玉坡
弱水蓬萊五萬里不知何處月明多

觀祀南郊和李學士韻雅勤呼

帝乘法駕即南郊夾仗旌旗雜羽旄日月並行黃道迴
三辰環拱紫壇高皇心奕奕承天貺玄象昭昭答聖勞

欲吐妍詞誇懿典愧如楊馬涉風騷

又

萬戶綢繆寶篆香五雲飛處望龍章
旌旗向日珠璣瑩繖扇迎風錦繡張
玄衮有文皆黼黻彤盤無燎亦熒煌
相承禮樂真儒事阿閣新巢有鳳凰

駕畋柳林隨侍

陳益稷

仙仗平明擁翠華景陽鐘發海東霞
千官捧日臨春殿萬騎屯雲動曉沙
白鷄鞞翻山霧薄黃龍旗拂柳風斜

太平氣象民同樂南北梯航共一家

壽平章李韓公趙孟頫

瑞鍾光岳應時需日上天衢手自扶八表同風開壽域
五雲異彩映台符經綸至治歸賢相陶冶斯文屬大儒
為國白頭身未老掌中行見有明珠

壽王趙公八十

儒門弭節下蓬瀛燕處超然鶴骨清周室龍韜師尚父
漢廷鳩杖賜桓榮中州大國封全趙東閣賢良位列卿

白髮同僚欣盛事年年來此慶長生

壽布呼密相公

新築沙堤凍未晞雪餘愛日轉春暉黃鍾律應迎中氣
執法星明拱太微儀鳳自因夔樂至祥麟寧假豸冠威
明堂正爾思梁棟赤芾行看副衮衣

壽王左丞傳若金

南極諸星映赤霄東風二月滿青條焚香鳳閣春開宴
鳴玉龍墀午散朝但使經綸齊稷契不勞服食慕松喬

日長自度昇平曲聞聽雲間合九韶

壽饒國公楊載

可樂無如父母全既賢既貴又長年金壺賜出青雲上
玉珮朝辭白日邊楚木論春猶五百蟠桃稱壽必三千
似聞黃綺歸來後長向山中作隱仙

壽劉邢公王士熙

詔下金鑾第一廳春風湛露譙趨庭嘉辰又紱蒼龍角
僊侶同驂白鶴翎衛武高年猶入相韋賢老日只傳經

崆峒別有長生訣杖几凝香酒半醒

壽缶齋傳左丞張翥

六朝名德仰巍巍未許家園久息機霖雨帝方思汝作
衮衣人更望公歸南山一柱闕中土左轄三星近太微
欲向賓筵頌眉壽寸心遙與白雲飛

壽丞旨張疇齋薛漢

鍾王書法得精微每日霜毫不厭揮相業曲江金鑑錄
幽懷西塞綠蓑衣蟠桃開日三千歲古柏參天四十圍

應與赤松相伴約他年名遂早知幾

元日李兩山

筍班玉立五雲階曾醉天家舞馬杯坐困庾樓分月久
明從堯殿帶春來洪鈞暖入宮橋柳金鼎香傳驛使梅
爆竹一聲春夢曉沉香亭北牡丹開

正旦有感鄧文原

干戈短景去匆匆回首南朝一夢中世事盡隨天道北
春正依舊斗杓東四時玉燭堪調燮萬國車書想混同

寂寞荒山老松樹看渠梅柳競春風

京師上元夜雅勤呼

華月澄澄宿霧收萬家燈火見皇州
天閤虎豹依霄漢人海魚龍混斗牛
公子錦韉鳴玉勒內家珠箔控銀鈎
道旁亦有揚雄宅寂寞芸窗冷似秋

都門春日李村

紫陌香塵逐玉珂彤樓花暗弄雲和
光風已轉瀛洲草細雨微生太液波
月榭管絃鳴曙早水亭簾幕受寒多

少年易感傷春思喚起青娥對酒歌

京城春日 薩都拉

三月京城飛柳花燕姬白馬小紅車
旌旗日暖將軍府絃管春深宰相家
小海銀魚吹白浪層樓珠酒出紅霞
蹇驢破帽杜陵客獻賦歸來日未斜

西宮春日

九重五色金銀闕冠帶將軍盡羽林
上苑春鶯隨柳轉西宮午漏隔花深
天開閭闔收金鎖簾捲奎章聽玉音

白髮儒臣賣詞賦長門應費萬黃金

都中寒食

楊鵬翼

芳草青青湖上路少年遊冶不知回
烟花一望春無盡雲水相參雨欲來
夕浪放船重聽樂天風吹酒獨登臺
看圖萬里逢寒食車馬傾城起暮埃

清明省墓

鄧文原

短棹吳歌花滿川春帆愁斷夢莪篇
小溪蘋藻墻間祭春雨桑麻墓下田
黃壤有靈終異土青山無樹半荒阡

傷哉巴峽松楸路孤兔蒼寒六十年

暮春即事 李仲淵

垂柳陰陰雪擁沙殘陽淡淡水明霞
夜來枕上初聞雨今日枝頭不見花
啼鳥已傳春去信狂蜂猶趁晚來衙
柴門盡日無人到讀罷離騷自煮茶

禁城秋夕 李材

絳宮星淡海無波九陌猶聞動玉珂
閭闔微雲藏夕漏建章明月掛秋河
此身天地流萍遠故國關山落木多

欲聽鈞天塵夢隔紫簫吹盡桂婆娑

宗陽宮翫月

楊載

老君臺上涼如水坐看冰輪轉二更大地山河微有影
九天風露寂無聲蛟龍並起承金榜鸞鳳雙飛載玉笙
不信弱流三萬里此身今夕到蓬瀛

秋懷和姚子敬趙孟頫

落日孤城動鼓鼙樓中畫角不勝吹山川蕭瑟秋容淨
草木凋傷暮雨悲多病馬卿聊假日數奇李廣不逢時

卷簾白水青山外
隱几無言有所思

又

吳宮烟冷水空流
慘淡風雲黯素秋
禾黍故基曾駐輦
芙蓉高閣迥添愁
繡楹錦柱蛟龍泣
金沓瑤階鹿豕遊
宋玉平生最蕭瑟
欲將九辨賦離憂

又

銅雀春深漢苑空
邯鄲月冷照秦宮
烟花樓閣西風裏
錦繡湖山落照中
河水南來非禹迹
冀方北去有唐風

溪城秋色催遲暮，愁對黃雲沒斷鴻。

又

搔首風塵雙短鬢，側身天地一儒冠。中原人物思王猛，
江左功臣憶謝安。首著秋高戎馬健，江湖日短白鷗寒。
金樽綠酒無錢共，安得愁中却盡歡。

又

野曠天低木葉疎，水清沙白鳥相呼。胡笳處處軍麾滿，
鬼哭村村漢月孤。新亭舉目山河異，故國傷神夢寐俱。

金史卷之八
卷十
黃菊欲開人臥病可憐三逕已荒蕪

秋夕 元好問

小簾涼多睡思清一窓風雨送秋聲頻年但覺貂裘弊
萬古何曾馬角生寄食甘依嚴尹幕附書誰往鄧州城
消愁欲問東家酒恨殺寒雞不肯鳴

秋思 杜瑛

壯心忽忽劇懸旌秋氣能令客子驚白鴈不聞雲外過
清霜先向鬢邊生銅駝巷陌周東土金鳳樓臺鄴北城

千古繁華俱一夢空餘草木戰風聲

秋江感貫雲石

澄淨秋江一舸輕不堪蹤跡樂平生西風兩鬢山河在
落日滿船鴻鴈聲村酒尚存黃閣醉短檠猶照玉關情
料應今夜懷鄉夢殘葉蕭蕭月二更

秋曉睡覺陳益稷

海水盈盈漏轉籌霜風吹角出譙樓夢回淡月五更曉
心遠孤雲萬里秋玉帛幾年賓上國詩書半世老中州

平生事業渾如昨，無柰青燈照白頭。

京都和馬伯庸尚書韻

曹元用

灤水橋邊御道西，酒旗閒掛夕陽低。
春從玉樹陰中老，雲補蒼山缺處齊。
畫戟遙臨青瑣闥，紫騮解惜錦障泥。
鳳鸞自為明時出，宜傍上林高處棲。

又

柳簇金溝蘸碧波，雲深貝闕瞰重坡。
鳳凰曲奏鈞天樂，烏鵲橋通織女河。
萬井閭閻春浩蕩，六街車馬曉陂陀。

山人素有林泉興，柰此承明侍從何。

開平即事

陳宇

天開地闢帝王州，河朔風雲拱上游。
鵬影遠盤青海月，雁聲斜度黑山秋。
龍岡上遠三千陌，月殿香飄十二樓。
莫笑青衫窮太史，御烟曾見袞龍浮。

鳳凰山

浮屠百尺聳亭亭，落日鴉啼野蔓青。
故國盡消龍虎氣，荒山空帶鳳凰形。
金根輦路迎禪駕，玉樹歌臺語梵鈴。

金
卷十
惟有錢塘江上月年年隨鴈過寒汀

麻姑山郝天挺

路入雲關仙境佳
瓊田瑤草帶烟霞
貯經洞古留遺檢
養藥爐存失舊砂
青鳥不傳金母信
紫鸞應返玉皇家
岩扉不掩春長在
開盡碧桃千樹花

鑑湖李孝光

賀家湖裏見秋風
放翁宅前東復東
兩行雲樹忽遠近
十里荷花能白紅
行人濯足銀河上
越女梳頭青鏡中

我欲張帆上南斗扶桑碧海與天通

桃花渡萬石德躬

江上青青楊柳枝人家萬竹閉柴扉春風應候花爭發
社雨生寒燕未歸半樹木蘭依岸綠一行鷓鴣背人飛
濯纓空憶滄浪思不及漁郎有釣磯

函谷關施鈞

倚天樓閣勢崔嵬曾為鷄鳴半夜開百二山河秦世變
三千禮樂漢官來公孫白馬終難度老子青牛更不迴

當日東封聽此計
泥丸飛作變驚埃

番禺道中
聶古栢

玉斧飛霜大庾南
萬松深翠洗烟嵐
雲迷梧野山羅戟
月滿韶江水潑藍
椰子漿寒甘似蜜
荔枝香暖絕勝柑
中朝耆舊如相問
鳥語啾啁正未堪

狄仁傑墓
楊果

牝鷄聲裏紫宸寒
神器都歸竊弄間
一語喚回鸚鵡夢
九霄奪得鳳雛還
荒墳寂寞臨官道
清節孤高直太山

為問摸稜蘇相國當年相見果何顏

岳武穆王墓趙孟頫

鄂王墳上草離離
秋日荒涼石獸危
南渡君臣輕社稷
中原父老望旌麾
英雄已死嗟何及
天下中分遂不支
莫向西湖歌此曲
水光山色不勝悲

岳王墓潘純

湖水春來自綠波
空林人迹少經過
夜寒石馬嘶風雨
日落山精泣薜蘿
江左長城真自壞
鄴中明月竟誰歌

惟餘滿地萋弘血芳草年深碧更多

長安懷古楊奐

此心直欲作東周再到長安已白頭往事無憑空擊楫
故人何處獨登樓月搖銀海秦陵夜露滴金莖漢殿秋
落日酒醒雙淚眼幾時清渭向西流

洛陽懷古楊果

洛陽雲樹鬱崔嵬落日行人首重回山勢忽從平野斷
河聲偏到故宮哀五噫擬逐梁鴻去六印休驚季子來

惆悵青槐舊時路年年無數野棠開

燕中懷古 李源道

荊卿墓上草離離郭隗臺邊對落暉
戰國山川秋氣壯中原豪傑曉星稀
乾坤納納無人識南北年年有鴈飛
說似瀘溝橋畔柳安排青眼送將歸

錢塘懷古 趙孟頫

東南都會帝王州三月鶯花非舊遊
故國金人泣辭漢當年玉馬去朝周
湖山靡靡今猶在江水悠悠只自流

千古興亡盡如此春風麥秀使人愁

又潘純

海門寒日淡無輝偃月堂深玉漏稀萬竈貔貅江上老
兩宮環珮月中歸內園羯鼓催花發小院珠簾看雪飛
不道帳前胡旋舞有人行酒着青衣

又陳廷言

越水吳山共寂寥已無遺老話前朝海門三日潮聲歇
天目千年王氣消夜月烏啼龍井樹春風花落海鮮橋

威儀文物今何在回首浮屠倚碧霄

又施鈞

三日無潮事可哀坐觀天塹起征埃不期雲氣隨龍去
空有山形舞鳳來宇宙已放新日月烟霞猶鎖舊樓臺
後庭玉樹知何在又是春風兩度開

咸陽懷古

咸陽秋色草離離千古愁雲鎖翠微黃犬已亡秦鹿失
白蛇初斷漢龍飛烟消故國空流水樹老荒城自落暉

金史卷之八
應是驪山九泉下死魂猶望採芝歸

蘇臺懷古

汪元量

靈岩寺古樹森羅滿目興亡落逝波越相舟中西子去
楚王宮裏北人過歌臺日暖遊麋鹿禁苑風高走駱駝
却羨老僧無一事自攜鉶錫入烟蘿

汴梁懷古

雅勤呼

花石岡前麋鹿過中原秋色動關河欲詢故國傷心事
忍聽前朝皓齒歌蔓草無風嘶石馬荆榛有月泣銅駝

人間富貴皆如夢不獨興亡感慨多

彭城懷古

貢師泰

戲馬臺前擁旆旌三齊才破到彭城項王帳底猶虞舞
漢祖軍中盡楚聲百二山河功自棄八千子弟勢都傾
月明閒却烏江渡長使英雄恨不平

南宋故基

楊子承

天下車書正一家數逢陽九亂如麻兩朝北狩過天寶
四海南奔類永嘉陵寢可憐分異域衣冠不復返中華

鳳簫吹煖錢塘月誰念黃龍慘暮笳

賈相故邸潘詰

相業如何不到頭諸公歷歷頌伊周
夢迷葛嶺酣歌夜鬼哭樊城血戰秋
誤國正須憂六尺潰師寧忍駕孤舟
木棉菴裏催歸早誰掩湖山富貴羞

兩漢故都施鈞

漢室龍興四百秋西風依舊水東流
當年金馬知何在此日銅仙泣未休
三國山河分霸業兩都烟雨變荒丘

曹瞞不軌心何忍忘却平陽是列侯

武昌故內

烟樹蒼茫水渺茫古今人物幾興亡
鳳凰山冷雲猶合鸚鵡洲荒草亦香
江外鴈聲吳地遠雨餘秋色楚天涼
停鞭欲問曹劉事一曲漁歌又夕陽

館娃宮故址

苧蘿雲物媚脩容玉燕金鸞送入宮
吳下諫臣終受戮越中書史不言功
烏啼落月霜初曉鹿走春風草亦空

香徑屨廊隨世換，倚岩惟有寺樓紅。

漢武帝徐秋雲

萬戶千門禁漏遲，建章花發錦成帷。
瑤池有信青鸞至，金屋無人白燕飛。
風起輪臺春寂寂，露零仙掌月輝輝。
樓船簫鼓繁華夢，汾上年年只鴈歸。

唐明皇

太平風月屬三郎，羯鼓聲中思轉長。
天子錦纏娛虢國，貴妃音律教寧王。
人歸巫峽山空在，花落溫泉水更香。

誰信蓬萊青鳥使回來無語怨漁陽

杜子美錢惟善

四郊多壘未還鄉又別潼關謁鳳翔九廟君臣同避難
十年弟妹各殊方中興百戰洗兵甲萬里一身愁虎狼
寂寞羈懷窮獨叟按歌懷古恨茫茫

淮陰侯錢士龍

弓藏鳥死壯心摧楚破齊平夢一回自是假王先賈禍
非干真主不憐才生嫌絳灌為儕伍死與英彭化劫灰

惆悵無因見漂母王孫還起後人哀

元詩體要卷十